

**FUDBALSKI SAVEZ
BOSANSKO – PODRINJSKOG KANTONA GORAŽDE**

S T A T U T

**FUDBALSKOG SAVEZA BOSANSKO-PODRINJSKOG
KANTONA GORAŽDE**

Goražde, 19.04.2018.godine

S A D R Ž A J

I - DEFINICIJA TERMINA

II - OPĆE ODREDBE

Pravni status

Član 1.

Član 2.

III - NAZIV, SJEDIŠTE I OBILJEŽJA

Član 3.

Pravni subjektivitet, jezici i obaveze

Član 4.

Neutralnost i nediskriminacija

Član 5.

Pravila igre

Član 6.

Čiljevi i zadaci

Član 7.

IV - ČLANSTVO

Članovi Saveza

Član 8.

Prijem u članstvo

Član 9.

Zahtjev i procedura za prijem u članstvo

Član 10.

Prava članova

Član 11.

Obaveze članova

Član 12.

Istupanje i prestanak članstva, raspuštanje asocijacije člana, gubitak članskog statusa

Član 13.

V - POČASNI PREDSJEDNIK I POČASNI ČLANOVI

Član 14.

VI - ORGANIZACIJA

Organi, tijela i nezavisnost

Član 15.

Uslovi za status člana organa ili tijela FS BPK-a Goražde

Član 16.

VII - SKUPŠTINA

Član 17.

Članovi Skupštine

Član 18.

Član 19.

Delegati na Skupštini

Član 20.

Kvorum prisustva Skupštini

Član 21.

Nadležnost Skupštine

Član 22.

Sazivanje, predlaganje članova, kandidature

Član 23.

Mandat predstavnika FS BPK-a Goražde u IO NS FBiH i NS/FS BiH

Član 24.

Vanredna Skupština

Član 25.

Rukovođenje Skupštinom

Član 26.

Izbori i glasanje

Član 27.

Donošenje odluka

Član 28.

Zapisnik

Član 29.

VIII - IZVRŠNI ODBOR

Struktura, sastav

Član 30.

Kandidature, mandat i zamjena

Član 31.

Nadležnost Izvršnog odbora

Član 32.

Kalendar sjednica, dnevni red

Član 33.

Kvorum

Član 34.

Donošenje odluka, suspenzija članova IO i pravnih tijela, suspenzija i isključenje članova komisija

Član 35.

Komitet za hitnost FS BPK-a Goražde

Član 36.

Nadležnost i odlučivanje

Član 37.

Predsjednik FS BPK-a Goražde

Član 38.

Mandat predsjednika i dopredsjednika

Član 39.

Razrješenje pojedinca ili tijela

Član 40.

IX - PRAVNA TIJELA

Član 41.

Disciplinska komisija

Član 42.

Apelaciona komisija

Član 43.

Tužioci

Član 44.

X - KOMISIJE

Član 45.

Struktura komisije

Član 46.

Sjednice, odluke i druge odredbe

Član 47.

XI - SEKRETARIJAT (STRUČNA SLUŽBA SAVEZA)

Član 48.

Član 49.

Član 50.

Sekretar

Član 51.

XII - RAČUNOVODSTVO

Fiskalna godina, budžet

Član 52.

Revizija računovodstva

Član 53.

XIII - FINANSIRANJE SAVEZA

Član 54.

Član 55.

XIV – TV I MARKETINŠKA PRAVA

Televizijski i radio prenos

Član 56.

XV - TAKMIČENJA

Takmičenja na nivou FS BPK-a Goražde

Član 57.

Član 58.

Član 59.

Pravila takmičenja

Član 60.

Zabrana udruživanja ili saveza

Član 61.

XVI - DISCIPLINSKA PRAVILA

Član 62.

Disciplinske mjere

Član 63.

Član 64.

XVII - SPOROVI

Nezavisni i nepristrasni arbitražni tribunal- CAS

Član 65.

Nadležnost

Član 66.

XVIII –ZAVRŠNE ODREDBE

Važeći zakoni i teritorijalna nadležnost

Član 67.

Materija koja nije obuhvaćena Statutom

Član 68.

Raspuštanje Saveza

Član 69.

Primjena

Član 70.

Član 71.

Obaveza prilagođavanja sadašnjih statuta

Član 72.

Broj: 20-04-8/18
Goražde: 20.04.2018.godine

Na osnovu Zakona o udruženjima/udrugama i fondacijama Federacije BiH (Službene novine Federacije Bosne i Hercegovine broj 45/02), člana 24, stav 4 i 5. Zakona o sportu Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/11 i 1/14), i člana 76. stav 1. Statuta Nogometnog/Fudbalskog saveza Bosne i Hercegovine, Skupština Fudbalskog saveza BPK-a Goražde na sjednici održanoj dana 19.04.2018. godine u Goraždu u s v o j i l a j e

S T A T U T

FUDBALSKOG SAVEZA

BOSANSKO-PODRINJSKOG KANTONA GORAŽDE

I D E F I N I C I J A T E R M I N A

FIFA: Federation Internationale de Football Association
(Međunarodna nogometna organizacija)

UEFA: Unison udes Associatons Europeennes de football
(Evropska nogometna unija)

IFAB: International Football Association Board
(Međunarodni nogometni odbor koji donosi Pravila igre)

NS/FS BiH: Nogometni/Fudbalski savez Bosne i Hercegovine

SAVEZ: Fudbalski savez BPK-a Goražde sastoji se od klubova, općinskog saveza Goražde i udruženja fudbalskih sudija i instruktora.

ASOCIJACIJE:
(KANTONALNI FUDBALSKI SAVEZ):
Klubovi, udruženja i općinski savez Goražde učlanjeni u Fudbalski savez BPK-a Goražde.

DUŽNOSNIK: Svaki član komiteta ili komisije i pojedinci kao što su sudije, pomoćne sudije, treneri i drugi pojedinci odgovorni za tehnička, administrativna i medicinska pitanja u NS FBiH, ligama ili klubovima

IGRAČ: Svaki nogometaš registrovan u skladu sa važećim FIFA-inim odredbama

ORGANIZIRANI NOGOMET:

Nogomet koji je pod kontrolom FIFA-e i koji se organizira u skladu sa Pravilima igre

SKUPŠTINA: Najviše zakonodavno tijelo FS BPK-a GORAŽDE

IZVRŠNI ODBOR: Izvršni organ FS BPK-a GORAŽDE

ČLAN: Pravno ili fizičko lice koje je Skupština primila u članstvo FS BPK-a GORAŽDE

REDOVNI SUDOVI: Redovni sudovi u Federaciji BiH koji rješavaju sporove u skladu sa nadležnošću propisanom Ustavom FBiH i drugim zakonima FBiH

ARBITRAŽNI TRIBUNAL:

Nezavisni i nepristrasni arbitražni tribunal koji su osnovala pravna ili fizička lica i koji djeluje umjesto redovnog suda u okviru djelokruga rada i nadležnosti, osnovano u skladu sa državnim zakonima Bosne i Hercegovine.

CAS: Sud za arbitražu u sportu, u Lozani (Švicarska)

Napomena: Termin koji se odnose na fizička lica važe za oba gramatička roda/pola, a svaki termin u jednini važi za množinu i obratno

II OPĆE ODREDBE

Pravni status

Član 1.

Fudbalski savez Bosansko-podrinjskog kantona Goražde (u daljem tekstu Savez) je nevladino, nepolitičko i nezavisno sportsko udruženje, u obliku dobrovoljnog udruživanja općinskih fudbalskih/nogometnih saveza, fudbalskih/nogometnih klubova na području Bosansko-podrinjskog kantona Goražde kao i asocijacije pojedinaca-Udruženja stručnih lica osposobljenih za rad u fudbalu/nogometu radi ostvarivanja zajedničkih ciljeva i interesa, zajedničkog nastupanja u oblasti nogometnog sporta i organizovanja takmičenja na nivou Bosansko-podrinjskog kantona Goražde u skladu sa Ustavom i Zakonom, a čija osnovna svrha nije sticanje dobiti.

Savez je po svom karakteru, organizaciji, sportskim aktivnostima i djelatnostima kao i ciljevima samostalna nogometna asocijacija na nivou BPK-a Goražde sa zadatkom da organizira i promoviše fudbalski sport u BPK-a Goražde, a u skladu sa Zakonom, ovim Statutom, odlukama Skupštine i Izvršnog odbora Saveza, kao i Statutima Nogometnog saveza Federacije Bosne i Hercegovine, Nogometnog/Fudbalskog saveza Bosne i Hercegovine, direktivama i odlukama UEFA-e i FIFA-e.

Član 2.

Ovim Statutom, a u skladu sa Zakonom, uređuju se sljedeće oblasti i odredbe o: nazivu, sjedištu i obilježjima Saveza, skraćenom nazivu, adresi, ciljevima, sportskim aktivnostima i sportskim djelatnostima Saveza, pravima i obavezama članova Saveza, organima udruženja, ovlaštenjima, pravilima glasanja, korištenju i raspolaganju sredstava, javnosti rada, zastupanju, rješavanju sporova, prestanku rada i raspolaganju imovinom, izvorima finansiranja Saveza, izmjenama i dopunama Statuta, stupanju na snagu Statuta i drugim pitanjima.

III NAZIV, SJEDIŠTE I OBILJEŽJA

Član 3.

1 Naziv sportskog udruženja/udruge je: Fudbalski savez Bosansko-Podrinjskog kantona Goražde – skraćeno: FS BPK-a Goražde.

2 Sjedište saveza je u Goraždu, ulica Zaima Imamovića br.44

3 Savez ima znak, zastavu, pečat i štambilj.

4 Savez ima pečat koji je okruglog oblika sa natpisom na rubu pečata "Bosansko-Podrinjski Kanton" i fudbalskom loptom u sredini pečata na čijem gornjem rubu je natpis "Fudbalski savez", a na čijem donjem rubu je natpis "Goražde", s tim da će o rukovanju i upotrebi pečata Izvršni odbor Saveza donijeti poseban propis.

5 Savez će svoje djelatnosti provoditi na području Bosansko-podrinjskog kantona Goražde.

Pravni subjektivitet, jezici i obaveze

Član 4.

1 Savez ima svojstvo pravnog lica koje stiče danom upisa u Registar udruženja i fondacija kod Ministarstva za pravosuđe, upravu i radne odnose Bosansko-podrinjskog kantona Goražde u skladu sa Zakonom o udruženjima i fondacijama F BiH dok pravo obavljanja sportskih aktivnosti i djelatnosti stiče nakon upisa u Registar pravnih i fizičkih lica u oblasti sporta na nivou Bosansko-podrinjskog kantona Goražde kao i pravima i obavezama utvrđenih Zakonom i ovim Statutom.

2 Savez se upisuje u Registar udruženja i fondacija kod Ministarstva za pravosuđe, upravu i radne odnose Bosansko-podrinjskog kantona Goražde a u skladu sa Zakonom o udruženjima i fondacijama F BiH te u Registar pravnih i fizičkih lica u oblasti sporta

na nivou Bosansko-podrinjskog kantona Goražde kod Ministarstva za obrazovanje, mlade, nauku, kulturu i sport Bosansko-podrinjskog kantona Goražde u skladu sa Zakonom o sportu Bosansko-podrinjskog kantona Goražde.

3 Savez za preuzete obaveze odgovara sopstvenom imovinom (potpuna odgovornost).

4 Savez ima svoj žiro-račun.

5 Službeni jezici Saveza su jezici utvrđeni Ustavom Federacije Bosne i Hercegovine uz upotrebu latiničnog i ćirilicnog pisma.

6 Savez je udružen u Nogometni savez Federacije Bosne i Hercegovine.

7 Savez ima sljedeće dužnosti:

a) da u potpunosti poštuje Statut, propise, direktive i odluke tijela NS Federacije BiH, kao i pravila nogometne igre koja je donio IFAB.

b) da učestvuje u takmičenjima koja organizira NS Federacije BiH (ako je to primjenjivo),

c) da plaća članarinu i druge naknade kako to definira NS Federacije BiH

d) Savez, članovi, pridruženi članovi, klubovi, igrači, treneri, službena lica i dr.- putem svojih statuta, licenci, registracija ili nekog drugog pisanog dokumenta obavezuju se:

i) pridržavati se Statuta, propisa, direktiva FIFA-e, UEFA-e, NS/FS BiH i NS FBiH, kao i odluka drugih tijela,

ii) poštovati principe lojalnosti, integriteta, sportskog duha i fer pleja,

iii) poštivati Pravila nogometne igre koja je izdao IFAB ili Pravila igre za mali nogomet i nogomet na pijesku, koja je izdao Izvršni komitet FIFA-e,

iv) priznavati CAS kao nezavisni i nepristrasni arbitražni tribunal za državna i međunarodna pitanja, kako je to definirano Statutom NS Federacije BiH, kao i statutima FIFA-e i UEFA-e, te prihvatiti svaku odluku CAS-a,

v) izbjegavati bilo kakav oblik diskriminacije, kako je to definisano članom 5. Ovog Statuta i statutom NS/FS BiH.

vi) da izvršno tijelo bude slobodno izabrano, te da druga statutarna tijela budu birana ili imenovana na potpuno nezavisan način, bez uticaja trećih lica,

vii) da izabrani delegati ili zamjenski delegati za Skupštinu NS Federacije BiH imaju dužnost da prisustvuju redovnoj ili vanrednoj Skupštini NS Federacije BiH,

viii) osigurati da imenovani ili izabrani članovi ili zamjenski članovi nekog statutarnog tijela NS Federacije BiH imaju dužnost da prisustvuju sastancima na koje su pozvani,

ix) da udruženi u Savez mogu sve svoje odluke donositi nezavisno od trećih lica i bez obzira na korporativnu strukturu koju je udruženi u Savez izabrao, te uzimajući u obzir propise o zaštiti integriteta takmičenja,

e) da svoje poslove vode nezavisno i da osiguraju da njihovi poslovi nisu pod uticajem trećih lica,

f) da održi izbornu Skupštinu u istoj godini kad i FS BPK-a Goražde, ,

g) da osigura da je mandat predsjednika maksimalno četiri godine,

h) da poštuje i unaprjeđuje jedinstvo Saveza.

i) da ne održava bilo kakve kontakte sa savezima članovima FIFA-e i UEFA-e bez prethodnog odobrenja NS Federacije BiH; isto važi za bilo koji savez koji je suspendiran ili isključen iz FIFA-e, uključujući pridružene članove,

j) da se u potpunosti pridržava svih drugih dužnosti koje proizilaze iz Statuta NS Federacije BiH i drugih propisa.

8 Savez se obavezuje da će usko sarađivati sa NS Federacije BiH u cilju razvoja i unaprjeđenja nogometa na svim nivoima, kao i na organizaciji takmičenja na nivou BiH.

9 Savez ima prava i obaveze koje proizilaze iz takmičenja koja su u njegovoj nadležnosti. U skladu sa propisima NS/FS BiH, ima i obavezu da:

a) registrira klubove i pojedince (igrače, trenere, sudije i zvaničnike) i vodi evidenciju o njima,

b) odobrava stadione i druge nogometne objekte, koji su smješteni na teritoriji BPK-a Goražde,

- c) NS/FS BiH pruža sve potrebne informacije na njegov zahtjev.
- 10 Savez može prethodno navedena prava i dužnosti dodijeliti u nadležnost općinskim savezima, uz saglasnost NS Federacije BiH.

Neutralnost i nediskriminacija

Član 5.

- 1 FS BPK-a Goražde je neutralan u političkim i vjerskim pitanjima.
- 2 Diskriminacija bilo koje vrste, protiv neke zemlje, privatnog lica ili grupe ljudi, na osnovu etničkog porijekla, spola, jezika, politike ili bilo kog drugog razloga, strogo je zabranjena i može se sankcionisati suspenzijom, isključenjem ili drugim disciplinskim mjerama.

Pravila igre

Član 6.

- 1 FS BPK-a Goražde i svaki njegov član igraju organizovani nogomet u skladu sa Pravilima igre koje je izdao IFAB, ili sa Pravilima igre za mali nogomet i nogomet na pijesku, koje je izdao Izvršni komitet FIFA-e.
- 2 Samo IFAB ili Izvršni komitet FIFA-e mogu propisati ili izmijeniti odgovarajuća Pravila igre.

Ciljevi izadaci

Član 7.

- 1 Ciljevi Saveza su sljedeći:
- a) da se bavi svim pitanjima koja se odnose na nogomet na području BPK-a Goražde.
 - b) da održava kontakte i surađuje sa NS Federacije BiH, FS RS i sa NS/FS BiH,
 - c) da štiti i poštuje prava i interese svojih članova i da rješava sporove među njima,
 - d) da unaprjeđuje nogomet u duhu mira i fair playa, bez diskriminacije po političkom, spolnom, vjerskom i rasnom osnovu,
 - e) da poštuje principe lojalnosti, integriteta i sportskog duha u skladu sa principima fer pleja.
- 2 Sportske aktivnosti i sportske djelatnosti Saveza su:

Radi ostvarivanja gore utvrđenih ciljeva te sportskih aktivnosti koje obuhvataju sportske priredbe(sportska takmičenja i sportske manifestacije) u Savezu se obezbjeđuju svi neophodni uslovi za njihovo obavljanje izvršavanjem slijedećih djelatnosti:

- a) da utvrdi sistem,uslove i organizaciju sportskih fudbalskih takmičenja na nivou BPK-a Goražde u skladu sa Zakonom,ovim Statutom i Pravilima igre koje je izdao IFAB, ili sa Pravilima igre za mali nogomet I nogomet na pijesku,koje je izdao Izvršni komitet FIFA-e.
- b) da rukovodi svim takmičenjima na nivou BPK-a Goražde shodno Pravilniku o nogometnim takmičenjima i zakonom te da definiše njihovu organizaciju propozicijama takmičenja.
- c) da definira opće organizacione i administrativne principe za nogomet u BPK-a Goražde,
- c) da donosi programe i pravilnike školovanja i stručnog usavršavanja kadrova za rad u nogometu u BPK-a Goražde, u BPK-a Goražde u skladu sa zakonom i sportskim pravilima,
- d) da donosi programe i pravilnike školovanja i stručnog usavršavanja kadrova za rad u nogometu

- e) da definiše ovlaštenja koja se dodjeljuju bilo kojem udruženju na nivou Saveza, kao i njihova prava i obaveze. Statuti i Pravilnici svakog takvog udruženja podliježu odobrenju od strane Saveza.
- f) da osigurava izvore novčanih sredstava za financiranje nogometnog sporta a Savez svoju djelatnost ne smije obavljati radi sticanja dobiti. Ako u obavljanju svoje djelatnosti FS BPK-a Goražde ostvari dobit, ona se mora koristiti isključivo za obavljanje i unaprjeđenje djelatnosti Saveza, kojima se ostvaruju ciljevi Saveza.
- g) da obezbjedi sportsko suđenje na svim takmičenjima kojim rukovodi;
- h) da obezbjedi poslove redovnog informisanja svih članica kao i javnosti;
- i) da pruži pomoć svojim članovima u unaprjeđenju stručnog rada;
- j) da pruža savjetodavne usluge svojim članicama;
- k) da obezbjedi vođenje evidencije u skladu s jedinstvenim informacionim sistemom u sportu u skladu sa Zakonom;
- l) obavlja i druge sportske djelatnosti određene zakonom, Statutom i pravilnicima Saveza.
- m) da Direktive iz FIFA- e UEFA- e, NS/FS BiH i NS FBiH, a shodno odlukama Izvršnog odbora FS BPK Goražde, provodi na niže organizacione nivoe (klubove i udruženja) u skladu sa odredbama ovog Statuta.

IV ČLANSTVO

Članovi Saveza

Član 8.

1 Članovi saveza su Fudbalski savez općine Goražde, Nogometni klub "Gradac" Vranići, Nogometni klub „Kolina“ Ustikolina, Fudbalski klub „Radnički“ Goražde, Fudbalski klub „Drina“ Goražde, Fudbalski klub „Jahorina“ Prača, Nogometni klub „Berič-Kiseljak“, Fudbalski klub „Dribling“ Goražde, Malonogometni klub „Drina“ Goražde, Udruženje fudbalskih sudija i instruktora suđenja Bosansko-podrinjskog kantona Goražde i Udruženje fudbalskih trenera.

2 Članovi Saveza mogu biti drugi fudbalski/nogometni sportski klubovi sa područja Bosansko-podrinjskog kantona Goražde i Udruženja stručnih lica osposobljenih za rad u fudbalu koji su prethodno upisani u Registar udruženja i fondacija kod Ministarstva za pravosuđe, upravu i radne odnose Bosansko-podrinjskog kantona Goražde u skladu sa Zakonom o udruženjima i fondacijama F BiH i u Registar pravnih i fizičkih lica u oblasti sporta na nivou Bosansko-podrinjskog kantona Goražde kod Ministarstva za obrazovanje, mlade, nauku, kulturu i sport Bosansko-podrinjskog kantona Goražde u skladu sa Zakonom o sportu Bosansko-podrinjskog kantona Goražde.

3 Mogućnost iz stave 2. ovog člana ostavljena je sve do ispunjenja uslova iz člana 24 stav 1. Zakona o sportu Bosansko-podrinjskog kantona Goražde odnosno do osnivanja Fudbalskog saveza općine Foča (F BiH) i Fudbalskog saveza općine Prača (F BiH) i upisa istih u Registar udruženja i fondacija kod Ministarstva za pravosuđe, upravu i radne odnose Bosansko-podrinjskog kantona Goražde u skladu sa Zakonom o udruženjima i fondacijama F BiH i u Registar pravnih i fizičkih lica u oblasti sporta na nivou Bosansko-podrinjskog kantona Goražde kod Ministarstva za obrazovanje, mlade, nauku, kulturu i sport Bosansko-podrinjskog kantona Goražde u skladu sa Zakonom o sportu Bosansko-podrinjskog kantona Goražde, izuzev sportskih asocijacija-Udruženja stručnih lica osposobljenih za rad u fudbalu koja svoje sportske aktivnosti i sportske djelatnosti provode na teritoriji Bosansko-podrinjskog kantona Goražde.

Teritorijalna baza tri općinska nogometna saveza odgovara Bosansko-podrinjskom kantonu Goražde onako kako je definisano Ustavom.

Prijem u članstvo

Član 9.

1 Skupština Saveza, na osnovu preporuke Izvršnog odbora FS BPK-a Goražde prima u članstvo i vrši suspenziju ili isključuje iz članstva bilo kojeg člana FS BPK-a Goražde.

2 Svako pravno lice koje želi postati član FS BPK-a Goražde mora se pismeno prijaviti Sekretarijatu, koji podnosi pismeni izvještaj Izvršnom odboru.

3 Zahtjev sadrži:

- a) primjerak zakonski važećeg Statuta i propisa, osnivački dokument i dokaz o registraciji kod nadležnog državnog organa,
- b) izjavu da će sve domaće utakmice igrati na teritoriji Bosne i Hercegovine,
- c) izjavu da se podnosilac prijave obavezuje da će uvijek poštivati Statut, propise, direktive i odluke NS FBiH, NS/FS BiH, FIFA-e i UEFA-e, te osigurati da ih poštuju i svi njegovi članovi, klubovi, službena lica, igrači i treneri,
- d) izjavu da je podnosilac prijave saglasan da se pridržava važećih Pravila nogometne igre koja je objavio IFAB, kao i Pravila igre za mali nogomet i nogomet na pijesku, koja je objavio Izvršni odbor FIFA-e,
- e) izjavu da priznaju nadležnost Arbitražnog suda (CAS) u Lozani (Švicarska), kako je navedeno u relevantnim odredbama Statuta FIFA-e i Statuta UEFA-e,
- f) izjavu da je saglasan da će u posljednjoj instanci svi sporovi domaćeg karaktera, koji proizilaze ili su vezani za primjenu Statuta FS BPK-a Goražde, propisa, direktiva ili odluka donesenih na osnovu tog Statuta, ili vezanih za bilo kakav ugovor, prosljeđivati na isključivu nadležnost nezavisnog i nepristrasnog arbitražnog tribunala, konkretno CAS-a u Lozani, kako je to navedeno u relevantnim odredbama Statuta FIFA-e, UEFA-e, NS/FS BiH i NS FBiH, dok se zakonodavstvom BiH ne uspostavi odgovarajući arbitražni tribunal, koji zadovoljava minimalne zahtjeve FIFA-e i UEFA-e. CAS će donositi konačna rješenja sporova bez redovnih sudova, osim ako to nije eksplicitno zabranjeno važećim zakonodavstvom Bosne i Hercegovine.
- g) izjavu kojom pokazuje da zakonski sastav podnosioca zahtjeva za članstvo u FS BPK-a Goražde, bez obzira na svoju pravnu strukturu, garantuje da je u stanju sve svoje odluke donositi nezavisno od bilo kojeg vanjskog tijela.
- h) dosje koji sadrži detalje o organizacionoj strukturi podnosioca zahtjeva (npr. broj klubova, igrača, službenih lica, sudija, trenera, imovine i tijela, itd.),
- i) listu svojih službenika, navodeći one koji su ovlašteni potpisnici sa pravom izvršenja pravno obavezujućih sporazuma sa trećim stranama,
- j) izjavu da se podnosilac zahtjeva slaže da će organizirati i učestvovati u prijateljskim utakmicama samo uz prethodnu saglasnost FS BPK-a Goražde,
- k) primjerak zapisnika sa zadnje sjednice Skupštine podnosioca zahtjeva ili sa njegovog osnivačkog sastanka,
- l) izjavu da će podnosilac zahtjeva osigurati da se njegovi članovi, klubovi, dužnosnici, igrači, treneri medicinsko osoblje i dr. pridržavaju zahtjeva navedenih pod gornjim tačkama b) do g) putem statuta, registracije, licence ili nekog drugog pisanog i potpisanog dokumenta.

4 Asocijacije pojedinaca (udruženja) moraju svoje aktivnosti organizirati na cijeloj teritoriji BPK-a Goražde i to navesti u svojoj prijavi.

Asocijacije pojedinaca (udruženja) se ne mogu formirati bez prethodne pismene saglasnosti FS BPK-a Goražde.

5 Asocijacije ili grupe klubova nadalje moraju dati izjavu da niti jedno pravno ili fizičko lice (uključujući holding kompanije i podružnice) nema kontrolu nad više od jednog kluba ili grupe, kad god bi integritet bilo koje utakmice ili takmičenja mogao biti ugrožen.

Zahtjev i procedura za prijem u članstvo

Član 10.

- 1 Skupština usvaja posebne propise koji regulišu proceduru prijema u članstvo svih zainteresovanih koji ispunjavaju uslove iz člana 8. Ovog Statuta, a čije donošenje ne može biti u suprotnosti sa Zakonima i ovim Statutom.
- 2 Izvršni odbor na prvoj narednoj sjednici Skupštini preporučuje da li da primi ili ne primi nekog podnosioca zahtjeva u članstvo isključivo na osnovu Zakona i ovog Statuta.
- 3 Podnosilac zahtjeva može iznijeti Skupštini razloge za svoju prijavu u članstvo.
- 4 Skupština na osnovu svog punog diskrecionog prava donosi konačnu odluku o prijavi nekog kandidata za članstvo u Savez uz obavezu poštivanja Zakona i ovog Statuta. Delegati imaju pravo da glasaju, a rezultati tog glasanja na snagu stupaju odmah.

Prava članova

Član 11.

- 1 Članovi imaju sljedeća prava:
 - a) da učestvuju u Skupštini FS BPK-a Goražde, da unaprijed dobiju njen dnevni red, da budu pozvani na Skupštinu u propisanom vremenu, te da ostvaruju svoje pravo glasa,
 - b) da daju prijedloge za uklanjanje u dnevni red Skupštine,
 - c) da nominuju kandidate za izbor u sva tijela FS BPK-a Goražde,
 - d) da podnose zahtjev za sazivanje vanredne Skupštine,
 - e) da budu obaviješteni o poslovima FS BPK-a Goražde, kroz njena zvanična tijela,
 - f) da učestvuju u takmičenjima (ako je to primjenjivo) i/ili drugim sportskim aktivnostima koje organizira FS BPK-a,
 - g) da ostvaruje sva druga prava koja proizilaze iz Statuta i propisa FS BPK-a.
- 2 Ostvarivanje ovih prava podliježe drugim odredbama Statuta i važećih propisa.

Obaveze članova

Član 12.

- 1 Članovi imaju sljedeće dužnosti:
 - a) da u potpunosti i uvijek poštuju Statut, propise, direktive i odluke tijela FS BPK-a Goražde, NS FBiH i NS/FS BiH, kao i odluke CAS-a donesene po žalbi na osnovu ovog Statuta,
 - b) da učestvuju u takmičenjima koja organizira FS BPK-a Goražde,
 - c) da plaćaju članarinu i druge naknade, kako to definira FS BPK-a Goražde, NS FBiH i NS/FS BiH.
- 2 članovi, pridruženi članovi, klubovi, igrači, treneri, službena lica i dr. moraju:
 - I da se pridržavaju principa lojalnosti, integriteta, sportskog duha u skladu sa duhom fer-pleja,
 - II da poštuju principe netralnosti i nediskriminacije u političkim i vjerskim pitanjima, u skladu sa članom 5. Statuta NS/FS BiH.
 - III da se pridržavaju važećih Pravila igre, kako ih je objavio IFAB kao i Pravila igre za mali nogomet i nogomet na pijesku, koje je objavio izvršni odbor FIFA-e,

IV da se obavežu Statutom, da će se pridržavati propisa i direktiva FS BPK-a Goražde, NS FBiH, NS/FS BiH, FIFA-e i UEFA-e, kao i odluka donesenim u skladu sa njima,

V da priznaje nadležnost CAS-a, kako je navedeno u relevantnim odredbama Statuta FIFA-e i Statuta UEFA-e,

VI sve sporove koji su rezultat ili proizilaze iz primjene Statuta FS BPK-a Goražde, Statuta NS FBiH i Statuta NS/FS BiH, propisa, direktiva ili odluka donesenih na osnovu Statuta ili u vezi sa bilo kakvim ugovorom, u posljednjoj instanci iznose pred isključivu nadležnost nezavisnog i nepristrasnog arbitražnog tribunala, konkretno CAS-a u Lozani (Švicarska), kako je to navedeno u relevantnim odredbama FIFA-inog i UEFA-inog statuta, dok propisima Bosne i Hercegovine ne bude ustanovljen odgovarajući arbitražni tribunal na teritoriji Bosne i Hercegovine, koji ispunjava minimalne zahtjeve FIFA-e i UEFA-e. CAS će davati konačna rješenja takvih sporova bez učešća redovnog suda, osim ako to nije eksplicitno zabranjeno važećim zakonodavstvom u Bosni i Hercegovini.

VII Spisak svojih izabranih organa članice su dužne dostaviti u Savez u roku od 30 dana u protivnom Savez nije dužan prihvatiti imenovanja.

3 Članovi se obavezuju da će usko sarađivati sa Savezom u cilju razvoja i unaprjeđenja nogometa na svim nivoima, kao i na organizaciji takmičenja na nivou FS BPK-a Goražde. Savez organizira najmanje jedno prvenstvo i jedan kup na nivou FS BPK-a Goražde i podstiče druga takmičenja.

4 Članovi imaju prava i obaveze da vrše registraciju i evidenciju igrača, stručnih kadrova, nogometnih klubova, objekata i terena na području FS BPK-a Goražde u skladu sa propisima i pravilima FS BPK-a Goražde, NS FBiH, odnosno NS/FS BiH.

5 Članovi se obavezuju da će izbjeći formiranje raznih interesnih grupa, koje prejudiciraju ili bi mogle prejudicirati jedinstvo nogometa u FS BPK-a Goražde.

6 Članovi se obavezuju da će poštovati i unaprjeđivati interes i cjelovitost Saveza.

7 Članovi Saveza se obavezuju da održavaju izbornu Skupštinu u istoj godini kad FS BPK-a Goražde i NS FBiH.

8 Članovi moraju osigurati da se izvršno tijelo njihove asocijacije bira putem slobodnih izbora i da tu odredbu uključe u njihove Statute, u protivnom, Savez će odbiti da prizna takvo tijelo.

9 da osiguraju da je mandat njihovih predsjednika maksimalno četiri godine.

10 Statuti članova sadrže odredbu da je svaki klub koji je član asocijacije u poziciji da donosi vlastite odluke po svim pitanjima vezanim za svoje članstvo i to neovisno od bilo kojeg vanjskog dijela. Posebno, svaki kantonalni/županijski savez mora uputiti svoje klubove da se pridržavaju te obaveze, neovisno o korporativnoj strukturi koju klub izabere.

11 da će organizirati takmičenja koja mu u nadležnost ustupi NS FBiH.

12 nije dopušteno da članovi održavaju kontakte sa nogometnim savezima učlanjenim u FIFA-u, UEFA-u, bez odobrenja od strane Saveza i NS/FS BiH.

13 da se u potpunosti pridržavaju svih drugih dužnosti koje proizilaze iz ovog Statuta i drugih propisa.

14 Ako bilo koji član prekrši gore navedene dužnosti, to može dovesti do sankcija predviđenih ovim Statutom. Nadležna pravna tijela FS BPK-a Goražde mogu izreći daljnje sankcije.

15. Sticanjem uslova za formiranje 3 općinska Saveza u skladu sa članom 8 stav 3 ovoga Statuta svim aktivnostima rukovodi FS BPK-a Goražde uz obavezno organizovanje novih Skupština tih općinskih Saveza.

Općinski savez koji nema 3 kluba u takmičenju seniora i registrovane igrače seniore minimum 3 godine ne ispunjava uslove da daje delegate Skupštine i članove Izvršnog odbora u FS BPK-a Goražde.

Formiranjem svih općinskih saveza u skladu sa zakonom, FS BPK-a Goražde će uvažavajući broj klubova koji egzistiraju na pojedinom općinskom savezu formirati broj delegata Skupštine i broj članova Izvršnog odbora Saveza.

16. Članovi Saveza su obavezni da obavijeste i pozovu Predsjednika i Generalnog sekretara da prisustvuju svakoj zakazanoj Skupštini, u suprotnom FS BPK Goražde neće uvažiti održanu Skupštinu.

Istupanje i prestanak članstva, raspuštanje asocijacije članova i gubitak članskog statusa

Član 13.

1 Član Saveza može istupiti iz članstva Saveza na kraju fiskalne godine, pod uslovom da o tome obavijesti Skupštinu putem Sekretarijata Saveza šest mjeseci unaprijed.

2 Istupanjem iz članstva Saveza udruženi član gubi status asocijacije koji je ostvario putem Saveza, a njegov članski status i prava istovremeno prestaju.

3 Član može biti isključen iz Saveza u slučaju da:

- a) ne ispunji svoje finansijske obaveze prema Savezu,
- b) teško i ponovljeno krši Statut, pravilnike i odluke Saveza,
- c) ugrožava interese i jedinstvo Saveza,
- d) izgubi svojstva na bazi kojih je dobio članski status.

4 Odluku o prestanku članstva donosi Skupština u skladu sa odredbama ovog Statuta.

5 Član mora ispuniti sve svoje finansijske obaveze prema Savezu prije nego što izgubi članski status.

6 Istupanjem iz članstva jednog od članova prestaju važiti odredbe ovog Statuta za člana kluba koji istupi iz članstva.

7. Istupanje ili isključenje kluba iz takmičenja zahtjeva novu prijavu za takmičenje uz uslove kao novoformirani klub o čemu odluku donosi Skupština FS BPK-a Goražde.

V POČASNI PREDSEDNIK I POČASNI ČLAN

Član 14.

Na prijedlog Izvršnog odbora, Skupština može dodijeliti status počasnog predsjednika ili počasnog člana. Taj status dodjeljuje se za posebne zasluge u nogometu.

Počasni predsjednici i počasni članovi mogu prisustvovati Skupštini u savjetodavnom svojstvu ali nemaju pravo glasa.

VI ORGANIZACIJA

Organi, tijela i nezavisnost

Član 15.

1 FS BPK-a Goražde ima sljedeća tijela koja donose odluke:

- a) Skupština (zakonodavno tijelo)
- b) Izvršni odbor (izvršno tijelo)
- c) Predsjednik (osoba ovlaštena za predstavljanje i zastupanje)
- d) Pravna tijela
- e) Sekretar (administrativno tijelo)

- 2 FS BPK-a Goražde ima sljedeća konsultativna tijela:
- a) Stalne komisije
 - b) Ad-hok komisije
 - c) Nezavisni revizor u skladu sa zakonom
 - d) Sekretarijat
- 3 Izvršni odbor FS BPK-a Goražde može stalnim komisijama prenijeti ovlaštenje za odlučivanje, kako je definisano u njihovom opisu poslova i zadataka.
- 4 Svi članovi tih organa i tijela FS BPK-a Goražde dužni su pridržavati se FIFA-inog Etičkog kodeksa prilikom vršenja svojih funkcija, kako je definisano ovim Statutom i relevantnim propisima.
- 5 Član Izvršnog odbora (uključujući predsjednika i dopredsjednika) ne može istovremeno biti i član pravnog tijela, delegat Skupštine ili sekretar i obratno.
- 6 Član nekog statutarog tijela/organa FS BPK-a Goražde ne smije učestvovati u donošenju odluka po bilo kojem pitanju u kojem postoji ili može nastati sukob interesa.
- 7 Svaki član statutarog organa ili tijela FS BPK-a Goražde dužan je prisustvovati pravovaljano sazvanim sastancima. Odsustva bez opravdanih razloga mogu dovesti do sankcija u skladu sa Statutom i Disciplinskim pravilnikom NS/FS BiH i dodatno dovesti do zamjene takvog člana u skladu s ovim Statutom.
- Glasanje putem opunomoćenika u nekom statutarom organu ili tijelu nije dozvoljeno.
- 8 Svaki član nekog organa ili tijela FS BPK-a Goražde ima jedan glas.

Uslovi za status člana organa ili tijela FS BPK-a Goražde.

Član 16.

- 1 Da bi postao kandidat za neko statutarno tijelo u FS BPK-a Goražde, to lice mora ispunjavati sve sljedeće uvjete: On ili ona mora:
- a) biti aktivan/aktivna u nogometnoj organizaciji FS BPK-a Goražde ili u nekom od njegovih statutarinih članova,
 - b) biti državljanin Bosne i Hercegovine,
 - c) imati prebivalište u Bosni i Hercegovini, obavezno imati prebivalište na području BPK Goražde 4 (četiri) godine prije održavanja izbora.
 - d) priložiti biografiju (CV) koja sadrži informacije o obrazovanju, profesionalnim iskustvima i aktivnostima u nogometnoj organizaciji,
 - e) podnijeti dokaz da nema izrečenu disciplinsku sankciju od strane disciplinskih organa NS/FS BiH, NS FBiH ili FS BPK-a Goražde, odnosno da se ne vodi u registru disciplinskih kazni izrečenih za povrede propisa za sljedeće disciplinske kazne:
 - zabrana vršenja funkcije u periodu dužem od 3 (tri) mjeseca.
 - smjenjivanje rukovodstva, isključenje iz kluba ili isključenje iz nogometne/fudbalske organizacije, Izrečena disciplinska sankcija mora biti potvrđena od strane Disciplinske komisije NS FBiH,
 - f) da nije pravosnažno kazneno osuđivan i da se ne vodi u registru osuđivanih lica zbog krivičnog djela učinjenog s umišljajem za koje mu je izrečena kazna zatvora na 3 (tri) mjeseca i više,
- Da nije pravosnažno kazneno osuđivan i da se ne vodi u registru osuđivanih lica zbog krivičnog djela u vezi sa sportom bez obzira na vrstu kaznene sankcije.
- g) Da kandidati za članove tijela na dan imenovanja u tijela FS BPK ne mogu biti stariji od 75 godina.
- 2 Zahtjevi iz tačke c) i f) ovoga člana primjenjuju se na sekretara, međutim izvršni odbor može kroz organizacione propise za navedeno lice postaviti i dodatne uvjete.
- 3 Ako osoba tokom svog mandata u FS BPK-a Goražde prestane ispunjavati jedan od uvjeta navedenih u stavu 1. ovog člana, onda ta osoba odmah gubi status člana tog tijela FS BPK-a Goražde.

VII SKUPŠTINA

Član 17.

- 1 Skupština je najviši organ upravljanja i odlučivanja u Savezu.
- 2 Skupština može zasjedati kao redovna i vanredna.
- 3 Redovna Skupština zasjeda jednom godišnje, obično u prvoj polovini kalendarske godine.
- 4 Redovna izborna Skupština zasjeda svake četiri godine

Članovi Skupštine

Član 18.

1. Delegate u Skupštinu Saveza mogu dati samo klubovi koji se takmiče u seniorskoj konkurenciji minimalno kontinuirano zadnje 3 godine, izuzev što klub futsala (mali nogomet) ima pravo dati delegate za izbore u 2020.godini.
2. Skupština Saveza se sastoji od delegata općinskog saveza Goražde, klubova koji ispunjavaju propisane uslove Saveza iz tačke 1 i Udruženja registrovanih u skladu sa Zakonom i ovim Statutom.
3. Skupštini prisustvuju novi delegati imenovani od članica Saveza.
4. Skupština se sastoji od utvrđenog broja delegata predloženog od strane Izvršnog odbora FS BPK-a Goražde pravovaljano izabranih na Skupštinama svojih klubova, udruženja i općinskog saveza Goražde.
5. Sljedeće osobe se pozivaju da prisustvuju Skupštini:
 - a) delegati članova FS BPK-a Goražde,
 - b) članovi Izvršnog odbora Saveza,
 - c) počasni predsjednici i počasni članovi,
 - d) predsjednik i generalni sekretar NS Federacije BiH,
 - e) drugi gosti koje pozove Izvršni odbor FS BPK-a Goražde.
6. Samo delegati članova FS BPK-a Goražde imaju pravo glasa na Skupštini FS BPK-a Goražde.

Član 19.

Raspodjela glasova je sljedeća:

- a) Delegati Skupštine Saveza imaju svaki po jedan glas. Općinski savez Goražde (koji predstavlja klubove članove Općinskog saveza) ima 6 (šest) delegata, klubovi koji ispunjavaju uslove iz člana 18. Statuta FS BPK-a Goražde (NK „Gradac“ Vranići, NK „Kolina“ Ustikolina, FK „Radnički“ Goražde, FK „Drina“ Goražde, NK „Berič-Kiseljak“ Berič, FK „Jahorina“ Prača, MNK „Drina“ Goražde, Udruženje sudija i instruktora suđenja i Udruženje fudbalskih trenera imaju po 3 (tri) delegata.
- b) Način i postupak aktiviranja zamjenskog delegata propisan je članom 20. tačka 4. ovog Statuta.

Delegati na Skupštini

Član 20.

- 1 Svaki član koji ispunjava uslove iz člana 18 Statuta FS BPK-a Goražde dostavlja sekretaru listu svojih delegata koji su pravovaljano i slobodno izabrani na njihovoj Skupštini.

Delegati ili zamjenski delegati trebaju biti izabrani najkasnije 40 dana prije održavanja Izborne Skupštine FS BPK-a.

2 Općinski savez Goražde (koji predstavlja klubove članove Općinskog saveza) bira 6 delegata i 2 zamjenska delegata, svaki klub udružen u FS BPK-a Goražde koji ispunjava uslove iz člana 18. Statuta FS BPK-a Goražde i udruženja (stručne organizacije) bira tri delegata i 2 zamjenska delegata Skupštine FS BPK-a Goražde za mandat od 4 (četiri) godine.

3 Mandat delegata u Skupštini traje 4 (četiri) godine i počinje da teče od dana verifikacije njegovog mandata u Skupštini, a ističe danom verifikacije mandata članova Skupštine novog-sljedećeg saziva Skupštine.

4 Delegat koji nije u mogućnosti da prisustvuje Skupštini iz bilo kog razloga, mora se odmah javiti Sekretaru FS BPK-a Goražde, da bi imenovao zamjenu. Nakon obaveznih konsultacija sa odgovarajućim Predsjednikom kluba, Sekretar FS BPK-a Goražde imenuje zamjenske delegate, nakon što od datog Predsjednika kluba dobije ažuriranu listu dostupnih zamjenskih delegata. Takav imenovani zamjenski delegat prisustvuje Skupštini FS BPK-a Goražde umjesto onog delegata koji to nije u mogućnosti.

5 Delegati se biraju najkasnije 40 (četrdeset) dana prije održavanja Izborne Skupštine FS BPK-a Goražde.

Kvorum prisustva Skupštini

Član 21.

1 Skupština (redovna ili vanredna) zasjeda pravovaljano i ima kvorum ako je prisutno 2/3 od utvrđenog broja delegata predloženog Skupštini od strane Izvršnog odbora Fudbalskog saveza BPK-a Goražde i odlučuje 2/3 većinom od ukupnog broja delegata.

2 U slučaju da nije postignut kvorum, Skupština zasjeda po istom dnevnom redu narednog dana na istom mjestu i u isto vrijeme. Ovom drugom zasjedanju mora prisustvovati natpolovična većina (50%+1) od ukupnog broja delegata da bi se donosile pravovaljane odluke.

3 Ako se ponovo ne postigne taj kvorum, Izvršni odbor FS BPK-a Goražde saziva novu Skupštinu po istom dnevnom redu u roku od 15 dana. Sekretar FS BPK-a Goražde šalje pozive članovima i delegatima. Toj sjednici nije neophodan kvorum većine.

Nadležnost Skupštine

Član 22.

1 Skupština ima sljedeće nadležnosti:

- a) usvaja, mijenja i dopunjava dnevni red, osim u slučajevima iz člana 21. stav 2. i 3.
- b) bira dva delegata kao ovjerivače zapisnika,
- c) usvaja Statut Saveza, kao i njegove izmjene i dopune,
- d) usvaja Poslovnik o radu Skupštine, kao i izmjene i dopune Poslovnika,
- e) usvaja opis poslova i zadataka pravnih tijela,
- f) bira i razrješava predsjednika,
- g) bira i razrješava članove IO FS BPK-a Goražde na osnovu liste kandidata klubova,
- h) usvaja plan prihoda i rashoda Saveza za tekuću godinu,
- i) razmatra i usvaja izvješće o finansijskom poslovanju Saveza,
- j) razmatra i usvaja izvještaj o izvršenju Plana prihoda i rashoda FS BPK-a Goražde.
- k) usvaja strukturu takmičenja na teritoriji BPK-a Goražde,
- l) usvaja nova i ukida takmičenja na teritoriji BPK-a Goražde,
- m) usvaja i razmatra programe i planove za sve vrste takmičenja na nivou Saveza, a sve na prijedlog Izvršnog odbora Saveza,
- n) bira po potrebi radna tijela Skupštine (odbor za glasanje, komisija za verifikaciju),
- o) dodjeljuje počasno članstvo,

- p) razmatra i donosi odluke po drugim pitanjima koja ovim Statutom nisu dana drugom organu, a spadaju u djelokrug Saveza i to na prijedlog Radnog predsjedništva Skupštine ili Izvršnog odbora Saveza,
- r) bira i razrješava pravna tijela Saveza FS BPK-a Goražde,
- s) bira 4 delegata i 2 zamjenska delegata Skupštine NS F BiH, bira 4 delegata i 2 zamjenska delegata Skupštine NS/FS BiH za mandat od četiri godine.
- t) odobrava listu od najmanje 2 kandidata (uključujući i zamjenske članove) za Izvršni odbor NS Federacije BiH i NS/FS BiH koji predstavljaju FS BPK-a Goražde.
- u) suspendira-isključuje članove ili službena lica Saveza,
- v) učlanjuje članstvo u Savez i vodi evidenciju o istupanju iz Saveza.
- 2 Sve potrebne materijale, po pitanjima koja su u nadležnosti Skupštine Saveza, priprema Izvršni odbor Saveza, uz podršku nadležnih tijela i Sekretarijata.

Sazivanje, predlaganje članova, kandidature

Član 23.

- 1 Odluku o sazivanju redovne sjednice Skupštine donosi Izvršni odbor Saveza na svoju inicijativu 30 dana prije dana održavanja, ili na inicijativu 2/3 klubova, Udruženja i općinskog Saveza Goražde preko svojih delegata članica Saveza. Izvršni odbor utvrđuje dnevni red sjednice.
- 2 Poziv za održavanje Skupštine sa prijedlogom dnevnog reda, vremenom i mjestom održavanja sekretar upućuje članovima Skupštine i klubovima i članovima Izvršnog odbora najkasnije u roku od 15 dana prije održavanja Skupštine.
- 3 Članovi Skupštine, odnosno klubovi članovi mogu dostaviti prijedlog za izmjenu i dopunu dnevnog reda sa obrazloženjem i eventualnim pisanim materijalima sekretaru Saveza, koji je dužan sa istim upoznati predsjednika i Izvršni odbor Saveza, najkasnije 7 dana prije održavanja Skupštine. Sekretar potrebne materijale sa konačnim dnevnim redom upućuje pozvanim najmanje sedam dana prije Skupštine.
- 4 Kandidature za izborne funkcije (uključujući njihove radne biografije) moraju biti dostavljene pismenim putem u Sekretarijat najkasnije 30 dana prije datuma održavanja Skupštine Saveza.

Mandat predstavnika FS BPK-a Goražde u IO NS FBiH i NS/FS BiH

Član 24.

- 1 Skupština FS BPK-a Goražde predlaže najmanje 2 kandidata (uključujući i zamjenske članove) za Izvršni odbor NS FBiH i 2 kandidata za Izvršni odbor NS/FS BiH koji predstavljaju FS BPK-a Goražde.

Vanredna Skupština

Član 25.

- 1 Vanrednu sjednicu Skupštine saziva Izvršni odbor na pismeni zahtjev 2/3 članica preko svojih delegata u Skupštini. Zahtjev mora sadržavati teme za dnevni red i kratko obrazloženje zahtjeva, a mora se uputiti sekretaru Saveza.
- 2 Ako se pravovaljano zatraži sazivanje vanredne Skupštine, ona se mora održati u roku od najviše 30 dana. Poziv za Skupštinu i njen dnevni red sekretar Saveza mora dostaviti pismenim putem članovima Saveza i delegatima Skupštine u roku od dvije sedmice.
- 3 Dnevni red vanredne Skupštine ne može se mijenjati.

Rukovođenje Skupštinom

Član 26.

Redovnom ili vanrednom Skupštinom rukovodi predsjednik, u slučaju odsutnosti predsjednika Skupštinom predsjedava najstariji član Izvršnog odbora Saveza.

Izbori i glasanje

Član 27.

- 1 Izbori se vrše tajnim glasanjem.
- 2 Druge odluke donose se javnim glasanjem sve dok Skupština ne odluči drugačije.
- 3 Nije dopušteno davanje punomoći za glasanje.
- 4 Suspendirani klubovi ili klubovi koji imaju status privremenog člana do ispunjavanja uslova propisanih ovim Statutom, nemaju svoje predstavnike.
- 5 Da bi bio izabran u prvom krugu glasanja, kandidat za Predsjednika Saveza mora dobiti 2/3 glasova članova Skupštine. U drugom krugu glasanja, u kojem učestvuju dva kandidata sa najvećim brojem glasova osvojenih u prvom krugu, kandidat mora dobiti najveći broj glasova. Kandidati za ostale funkcije biraju se većinom glasova prisutnih delegata Skupštine Saveza.
- 6 Uzdržani glasovi, nevažeći listići, ili drugi neprihvatljivi načini glasanja neće se uzimati u obzir.

Donošenje odluka

Član 28.

- 1 Skupština Saveza odluke donosi dvotrećinskom većinom od ukupnog broja članova Skupštine.
- 2 Kada Skupština zasjeda u novom sazivanju prema članu 21. stav 2. i stav 3. ovog Statuta, odluke se donose 2/3 većinom glasova prisutnih članova Skupštine.
- 3 Sljedeće odluke mogu biti donesene samo ako Skupština (redovna, vanredna ili ponovljena) ima kvorum od 2/3 od utvrđenog broja delegata predloženog Skupštini od strane Izvršnog odbora Fudbalskog saveza Bosansko-podrinjskog kantona Goražde i ako dobije 2/3 većinu glasova ukupnog broja članova o:
 - a) promjeni sjedišta Saveza,
 - b) izmjeni dnevnog reda
 - c) usvajanju i izmjeni strukture prvenstva na razini FS BPK-a Goražde (npr. broj ekipa koje sudjeluju, sistem takmičenja itd.),
 - d) usvajanju, izmjeni i dopuni Statuta FS BPK-a Goražde,
 - e) suspenziji i isključenju člana Saveza,
 - f) napuštanju- raspuštanju Saveza,
 - g) i drugim pitanjima o kojima odluči Skupština.
- 4 Odluke donesene na Skupštini provode se odmah, osim ako Skupština ne odluči drukčije.

ZAPISNIK

Član 29.

- 1 Sekretar odgovoran je za vođenje zapisnika na sjednici Skupštine.
- 2 Zapisnik sa održane sjednice Skupštine potpisuju ovjerivači zapisnika u roku od dvije sedmice od održane sjednice Skupštine. Ako Sekretarijat ne primi nikakav prigovor u roku od

dvije sedmice, zapisnik se smatra prihvaćenim. Svi prigovori dostavljaju se na sljedeću redovnu Skupštinu, na kojoj se donosi definitivna odluka.

VIII IZVRŠNI ODBOR

Struktura, sastav

Član 30.

- 1 Izvršni odbor je izvršno tijelo Saveza.
- 2 Izvršni odbor sastoji se od predstavnika klubova (NK „Gradac“ Vranići, NK „Kolina“ Ustikolina, FK „Radnički“ Goražde, FK „Drina“ Goražde, NK „Berič-Kiseljak“ Berič, FK „Jahorina“ Prača, MNK „Drina“ Goražde) a koji ispunjavaju uslove iz člana 18. Statuta FS BPK-a Goražde i 2 (dva) predstavnika Općinskog saveza Goražde (koji predstavlja klubove članove Općinskog saveza), 1 (jedan) predstavnik Udruženja fudbalskih sudija i instruktora suđenja i 1 (jedan) predstavnik Udruženja fudbalskih trenera, među kojima su predsjednik i podpredsjednik FS BPK-a Goražde.
- 3 Svaki kandidat za člana Izvršnog odbora potvrđuje volju za prihvatanje funkcije člana ovog tijela pred Skupštinom Saveza.

Kandidature, mandat i zamjena

Član 31.

- 1 Klubovi članice, općinski savez Goražde i Udruženja, za člana Izvršnog odbora predlažu po dva kandidata (uključujući zamjenskog).
- 2 Klubovi, općinski savez Goražde i udruženja dužni su sekretaru FS BPK-a Goražde pismenim putem dostaviti imena (uključujući biografije koje sadrže informacije o obrazovanju i profesionalnim iskustvima) kandidata predloženih za izbor u Izvršni odbor najkasnije 30 dana prije datuma održavanja Skupštine.
- 3 Trajanje mandata članova izvršnog odbora je četiri godine.
- 4 Svaki član Izvršnog odbora može biti ponovno izabran.
- 5 Ako se pojavi upražnjeno mjesto redovnog člana Izvršnog odbora, to upražnjeno mjesto će biti automatski popunjeno za preostali dio mandata zamjenskim članom, koji predstavlja isti klub kao odlazeći član.
- 6 U skladu sa članom 18. ovoga Statuta klubovi koji nemaju seniore u takmičenju i registrovane igrače ne mogu imati članove Izvršnog odbora do ispunjenja propisanih uslova.

Nadležnost Izvršnog odbora

Član 32.

Izvršni odbor:

- a) prije održavanja svake sjednice Skupštine FS BPK-a Goražde utvrđuje broj delegata i predlaže ih Skupštini FS BPK-a Goražde poštujući važeći Statut FS BPK-a Goražde,
- a1) donosi smjernice za rad Saveza i članova Saveza u svim aspektima fudbala,

- b) donosi odgovarajuće odluke i smjernice vezano za obaveze Saveza prema NS FBiH i NS/FS BiH, za koje ga ovlasti Skupština FS BPK-a Goražde,
- c) donosi poslovnik o radu stalnih i ad hoc komisija Saveza, te druge akte koji nisu u nadležnosti Skupštine,
- d) donosi prijedloge programa razvoja i unaprjeđenja nogometa na nivou BPK-a Goražde, Federacije BiH i BiH i u skladu s tim daje uputstva klubovima članicama,
- e) utvrđuje prijedlog Plana prihoda i rashoda i prijedlog izvještaja o izvršenju Plana prihoda i rashoda,
- f) donosi kalendar takmičenja na nivou FS BPK-a Goražde,
- g) donosi sve pravilnike i poslovnike, osim onih čije je donošenje u nadležnosti Skupštine,
- h) donosi propozicije za organizaciju takmičenja na nivou Saveza,
- i) usvaja listu službenih lica iz FS BPK-a Goražde,
- j) obrazuje i raspušta stalne i privremene komisije,
- k) imenuje predsjednike i članove stalnih i povremenih komisija iz svojih nadležnosti,
- l) razmatra i usvaja izvještaje stalnih i ad hoc komisija i Sekretarijata Saveza,
- m) predlaže Skupštini kandidate za status počasnih članova,
- n) na osnovu provedene procedure bira nezavisnog revizora,
- o) nadzire Sekretarijat,
- p) donosi Pravilnik o sistematizaciji i djelokrugu rada Sekretarijata Saveza.
- r) sprovodi odluke i zaključke Skupštine i stara se o njihovoj realizaciji, podnosi Skupštini izvješće o svom radu,
- s) odlučuje o zaštiti Pravilnika po podignutim zahtjevima-vanrednim pravnim sredstvima,
- t) usvaja izvješća organa koji nisu u nadležnosti Skupštine,
- u) obavlja i druge poslove za koje ga ovlasti Skupština ili su predviđeni općim aktima FS BPK-a Goražde.
- z) odlučuje i o svim ostalim pitanjima koja nisu u nadležnosti nekog drugog statutarnog tijela.
- ž) Izvršni odbor 30 dana prije održavanja Skupštine verifikuje listu delegata za Skupštinu FS BPK-a Goražde.

Kalendar sjednica, dnevni red

Član 33.

- 1 Izvršni odbor sastaje se u pravilu jednom mjesečno. Sjednicu saziva i njom predsjedava predsjednik. Na zahtjev 2/3 članova, predsjednik saziva sjednicu Izvršnog odbora u roku od deset dana.
- 2 Članovi Izvršnog odbora mogu dostaviti sekretaru teme za dnevni red najmanje deset dana prije održavanja sjednice.
- 3 Dnevni red dostavlja se članovima Izvršnog odbora najmanje 7 dana prije sjednice, od strane sekretara.
- 4 Sjednica Izvršnog odbora FS BPK-a Goražde nije otvorena za javnost. Izvršni odbor može pozvati treća lica da prisustvuju sjednici Izvršnog odbora. Ta treća lica nemaju pravo glasa, ali im je dozvoljeno da izraze svoje mišljenje uz dozvolu Izvršnog odbora.
- 5 Sekretar prisustvuje sjednicama Izvršnog odbora u konsultativnom svojstvu.

Kvorum

Član 34.

- 1 Izvršni odbor ima kvorum kada sjednici prisustvuje najmanje 50%+1 od ukupnog broja članova.
- 2 Ako se ne postigne ovaj kvorum, Izvršni odbor se automatski mora sastati narednog radnog dana na istom mjestu i u isto vrijeme, da bi razmatrao isti dnevni red.

3 U ponovljenoj sjednici Izvršni odbor ima kvorum ako je prisutno najmanje 50% od
ukupnog broja članova.

Donošenje odluka, suspenzija članova IO i pravnih tijela, suspenzija i isključenje članova komisija

Član 35.

- 1 Izvršni odbor donosi odluke sa najmanje 50%+1 glasova od ukupnog broja članova.
2 U ponovljenoj sjednici, odluke se donose s najmanje 50% glasova od ukupnog broja
članova Izvršnog odbora.
- 3 U slučaju jednakog broja glasova, u ponovljenoj sjednici odlučuje glas predsjednika ili
predsjedavajućeg.
- 4 Izvršni odbor donosi odluke samo o onim temama koje su pravovaljano stavljene na
dnevni red.
- 6 Odluke Izvršnog odbora provode se odmah, osim ako izvršni odbor ne odluči drugačije.
- 7 Ako član Izvršnog odbora FS BPK-a Goražde ne prisustvuje na najmanje tri propisno
sazvana sastanka tokom iste kalendarske godine, Izvršni odbor mora razriješiti takvog člana i
zamijeniti ga odgovarajućim zamjenskim članom do naredne Skupštine.
- 8 Ako član Izvršnog odbora napusti propisno sazvan sastanak bez opravdanog razloga,
Izvršni odbor može, na osnovu svog diskrecionog prava, razriješiti takvog člana i zamijeniti ga
odgovarajućim zamjenskim članom do naredne Skupštine.
- 10 Izvršni odbor može suspendirati jednog člana pravnog tijela do održavanja sljedeće
Skupštine, ako se dokaže da je kriv za teške propuste u obavljanju svojih zadaća ili da je
neispravno postupio. Konačnu suspenziju izriče Skupština.
- 11 Izvršni odbor može suspendirati ili isključiti iz funkcije članove komisija, te im imenovati
zamjenu za preostalo trajanje mandata.

Komitet za hitnost FS BPK-a Goražde

Član 36.

- 1 Komitet za hitnost FS BPK-a Goražde bavi se svim pitanjima koja traže da budu
riješena odmah, između dva sastanka Izvršnog odbora.
- 2 Komitet za hitnost sastoji se od tri (3) člana:
- a) predsjednik saveza
 - b) dopredsjednik saveza
 - c) jedan (1) redovni član Izvršnog odbora, kojeg imenuje predsjednik, od slučaja
do slučaja, a u skladu sa njegovom dostupnošću i uz izbjegavanje sukoba interesa.
- 3 Sekretar, po zahtjevu predsjednika, saziva sastanke Komiteta za hitnost. Ako se
sastanak ne može sazvati u odgovarajućem vremenskom roku, odluke se mogu donositi
drugim sredstvima komunikacije (telefon, telefax, pismo ili elektronska pošta).
- 4 Ako predsjednik nije u mogućnosti da prisustvuje ili ima sukob interesa, sastav
Komiteta za hitnost upotpunjuje se kroz imenovanje daljnjih članova Izvršnog odbora, po
redoslijedu najviše rangiranog i nepristrasnog člana ili, u slučaju da su samo redovni članovi
dostupni, po starini.
- 6 Član Izvršnog odbora koji u konačnici ima pravo da imenuje članove Komiteta za hitnost
za konkretan slučaj, isto tako i predsjedava umjesto predsjednika.
- 7 Sekretar zadužen je za administraciju Komiteta za hitnost i može prisustvovati
sastancima u savjetodavnom svojstvu. Daje administrativnu podršku i vodi zapisnik na tim
sastancima, koji podnosi svim članovima Izvršnog odbora, u pismenom obliku, u roku od tri
radna dana.

Nadležnost i odlučivanje

Član 37.

- 1 Komitet za hitnost je ovlašten da donosi odluke o hitnim pitanjima koja ulaze u nadležnost Izvršnog odbora.
- 2 Komitet za hitnost donosi valjane odluke ako svi imenovani članovi prisustvuju sastanku ili su uključeni u proces odlučivanja. Odluka se donosi ako je podrži najmanje dva člana, ali se uvijek mora tražiti konsenzus.
- 3 Ako se ne odluči drugačije, takva odluka stupa na snagu odmah.
- 4 Na narednoj sjednici Izvršnog odbora, predsjedavajući Komiteta za hitnost obavještava sve članove o vijećanju i odlukama, kao i o izvršenju tih odluka.

Predsjednik FS BPK-a Goražde

Član 38.

- 1 Predsjednik predstavlja i postupa u ime FS BPK-a Goražde.
- 2 On je prvenstveno zadužen za:
 - a) provođenje odluka koje donese Skupština i Izvršni odbor, kao i Komitet za hitnost, preko Sekretara;
 - b) osiguravanje djelotvornog funkcioniranja tijela FS BPK-a Goražde, da bi se ostvarili ciljevi opisani u ovom Statutu i programima koje odobri Skupština ili drugo nadležno tijelo;
 - c) nadziranje rada Sekretara;
 - d) održavanje odnosa između FS BPK-a Goražde i njegovih članova, NS FBiH, NS/FS BiH, svih drugih saveza članova i klubova, FS RS, kao i političkih vlasti i svih drugih organizacija.
- 3 Samo predsjednik može predložiti imenovanje ili razrješenje sekretara.
- 4 Uz podršku sekretara, predsjednik saziva i priprema sastanke Skupštine, Izvršnog odbora, kao i Komiteta za hitnost, kojem i predsjedava.
- 5 Predsjednik koordinira rad Skupštine, Izvršnog odbora i Komiteta za hitnost, te prati rad pravnih tijela, kao i stalnih i ad hoc komisija.
- 6 U slučaju neriješenog glasanja na Izvršnom odboru ili Komitetu za hitnost, predsjednikov glas je odlučujući.
- 7 U odsutnosti predsjednika ili nemogućnosti da izvršava svoje dužnosti zbog bolesti ili nesreće, Izvršni odbor imenuje zamjenika iz svojih članova, do naredne Skupštine.
- 8 Predsjednik, zajedno sa sekretarom, ima pravo da bude ovlašten potpisnik, osim ako nije drugačije određeno propisima Izvršnog odbora.

Mandat predsjednika

Član 39.

- 1 Mandat predsjednika traje četiri godine.

Razrješenje pojedinca ili tijela

Član 40.

- 1 Skupština može razriješiti pojedinca ili tijelo. Izvršni odbor može razrješenje pojedinca ili tijela staviti na dnevni red Skupštine. Izvršni odbor može privremeno razriješiti pojedinca ili tijelo, što odmah stupa na snagu, ako je takvo lice počinilo teško kršenje Statuta, propisa ili odluka donesenih na osnovu Statuta, ili izvršilo teško krivično djelo. Član Izvršnog odbora

može podnijeti prijedlog da se takav zahtjev za razrješenje stavi na dnevni red Izvršnog odbora ili Skupštine.

2 Zahtjev za razrješenje mora biti opravdan. Šalje se članovima FS BPK-a Goražde, zajedno sa dnevnim redom.

3 Dotični pojedinac ili tijelo ima pravo da traži da se oglasi u svoju odbranu. Ako je dotični pojedinac delegat u Skupštini ili član Izvršnog odbora, nema pravo glasa i tokom procesa glasanja mora napustiti prostoriju.

4 Ako se zahtjev za razrješenje podrži, Skupština ili Izvršni odbor donosi odluku tajnim glasanjem. Da bi se takav zahtjev usvojio, potrebna je većina od $\frac{3}{4}$ važećih glasova prisutnih članova.

5 Pojedinac ili tijelo koji su razriješeni (privremeno) moraju se odmah osloboditi svojih dužnosti. Takav pojedinac ili tijelo zamjenjuju se u skladu sa Statutom.

IX PRAVNA TIJELA

Član 41.

1 Pravna tijela Saveza su:

- a) Disciplinska komisija,
- b) Apelaciona komisija.
- c) Tužitelj

2 Članovi pravnih tijela ne mogu istovremeno biti članovi Izvršnog odbora ni bilo koje stalne ili ad hoc komisije.

3 Predsjednika i članove pravnih tijela i njihove zamjenike bira Skupština, u skladu sa odredbama ovog Statuta, na mandat u trajanju od 4 godine.

4 Prava i dužnosti svih pravnih tijela, funkcije predsjednika će biti utvrđene posebnim organizacionim propisima koje usvaja Izvršni odbor.

5 Nadležnost i način rada, kao i druge odredbe o radu pravnih tijela, bliže se regulišu poslovníkom o radu pojedinih pravnih tijela Saveza.

6 Predsjedavajući Disciplinske i Apelacione komisije moraju biti diplomirani pravnici.

7 U slučaju spriječenosti, na sljedećoj redovnoj Skupštini Saveza bira se zamjena za preostalo trajanje mandata. U međuvremenu, na upražnjeno mjesto imenuje se zamjena od strane Izvršnog odbora Saveza.

8 Ako pravovaljano pozvan član izostane sa sastanka bez opravdanog razloga ili ne glasa na dva uzastopna sastanka, Izvršni odbor može privremeno razriješiti tog člana s njegove funkcije. Nadalje, Izvršni odbor na narednoj Skupštini traži da se glasa o razrješenju tog člana. U slučaju potvrde razrješenja, delegati moraju provesti izbore kako bi isti bio zamijenjen za preostali dio mandata.

9 U osnovi sastav pravnih tijela treba sačinjavati: predsjednik i dva člana uz dva zamjenska člana.

Disciplinska komisija

Član 42.

1 Disciplinska komisija sastoji se od tri člana, uz dva zamjenska člana u cilju izbjegavanja sukoba interesa.

2 Predsjednik mora biti iz FS BPK-a Goražde .

3 Predsjednika i članova (uključujući i zamjenske) Komisije imenuje Skupština Saveza, na prijedlog Izvršnog odbora Saveza.

4 Kvorum je postignut kada su prisutna najmanje dva člana Komisije.

- 5 Odluke se donose 2/3 većinom glasova od ukupnog broja članova komisije.
- 6 U ponovljenoj sjednici, koja se mora održati u roku od osam dana, odluke se donose 2/3 većinom prisutnih članova
7. U slučaju jednakog broja glasova, odlučuje glas predsjednika ili predsjedavajućeg.

Apelaciona komisija

Član 43.

- 1 Apelaciona komisija sastoji se od tri člana, uz dva zamjenska člana u cilju izbjegavanja sukoba interesa.
- 2 Predsjednik mora biti iz FS BPK-a Goražde.
- 3 Predsjednika i članove (uključujući i zamjenske) Komisije imenuje Skupština Saveza, na prijedlog Izvršnog odbora Saveza.
- 4 Kvorum je postignut kada su prisutna dva člana Komisije.
- 5 Odluke se donose 2/3 većinom glasova od ukupnog broja članova Komisije.
- 6 U ponovljenoj sjednici, koja se mora održati u roku od osam dana, odluke se donose 2/3 većinom od ukupnog broja prisutnih članova.
- 7 Odluke Apelacione komisije su konačne.
- 8 Apelaciona komisija rješava sve žalbe na odluke Disciplinske komisije, Komisije za takmičenje i prvostepenih takmičarskih i disciplinskih organa liga koji su u nadležnosti FS BPK-a Goražde, prema odredbama ovog Statuta i odlukama Izvršnog odbora.

Tužioci

Član 44.

- 1 FS BPK-a Goražde ima jednog tužioca, koji mora biti diplomirani pravnik.
- 2 Tužilac zastupa interese FS BPK-a Goražde u disciplinskim postupcima.
- 3 Predsjednik FS BPK-a Goražde i predsjedavajući pravnih tijela mogu tražiti da tužilac FS BPK-a Goražde provede istragu.
- 4 Tužilac ima pravo uložiti žalbu na odluku Disciplinske komisije i reagovati na odluku Apelacione komisije.
- 5 Bliže odredbe o pravima i obavezama tužilaca utvrđuju se Pravilnikom o radu tužilaca, koji donosi Skupština.

X KOMISIJE

Član 45.

- 1 Stalne komisije su:
- a) Financijska komisija
 - b) Komisija za takmičenje
 - c) Stručno trenersko-tehnička komisija
 - d) Komisija za sportsku medicinu
 - e) Komisija za sudije i suđenje
 - f) Komisija za omladinski nogomet
 - g) Komisija za ženski nogomet
 - h) Komisija za mali nogomet
 - i) Komisija za status igrača

- j) Komisija za propise
- k) Komisija za stadione i bezbjednost
- l) Komisija za medije

2 Izvršni odbor može po potrebi osnivati nove stalne ili ad hoc komisije radi rješavanja posebnih pitanja.

3 Svaka komisija sastoji se od tri člana uključujući predsjednika.

4 Funkcije predsjednika komisije će biti utvrđene posebnim organizacionim pravilnikom.

5 Predsjednik mora biti iz FS BPK-a Goražde.

6 Korum je postignut kada su prisutna najmanje dva člana.

7 Komisije donose odluke 2/3 većinom ukupnog broja članova.

8 U ponovljenoj sjednici koja će se održati najkasnije u roku od osam dana, odluke se donose 2/3 većinom prisutnih članova.

9 U slučaju jednakog broja glasova, odlučuje glas predsjednika ili predsjedavajućeg.

Struktura komisija

Član 46.

1 Predsjednika i članove svake stalne komisije imenuje Izvršni odbor na mandat u trajanju od četiri godine, uz mogućnost ponovnog izbora.

2 Sastav članova stalnih komisija čine predsjednik i dva člana.

3 Odlukama Izvršnog odbora mogu se formirati i inokosni organi.

4 Izvršni odbor može donijeti odluku da poslove i zadatke iz nadležnosti takmičarskih organa obavljaju inokosni organi (komesar za takmičenje, komesar za suđenje, disciplinski sudac i dr.)

Sjednice, odluke i druge odredbe

Član 47.

1 Predsjednik rukovodi radom Komisije. Nakon obaveznih konsultacija sa sekretarom, on određuje datume sjednica. Predsjednik je odgovoran da komisija obavlja svoje poslove i da o tome redovno informiše predsjednika i Izvršni odbor, putem blagovremenog dostavljanja zapisnika sa sjednica.

2 Prava, nadležnosti i način rada komisije utvrđuju se odgovarajućim pravilnicima i poslovnica o radu komisija.

XI SEKRETAR i ovlasti

Član 48.

Sekretar obavlja svakodnevne aktivnosti administrativno-finansijsko-takmičarskog karaktera kao i poslove za opsluživanje organa, pravnih tijela i komisija Saveza.

Član 49.

1 Bliže odredbe o radu Sekretara Saveza, regulišu se Pravilnikom o radu i organizaciji.

2 Pravilnik, u smislu prethodnog stava, usvaja Izvršni odbor Saveza, na prijedlog predsjednika i sekretara.

Član 50.

Sekretar je odgovoran za administrativna pitanja, kao što su:

- a) provođenje odluka Izvršnog odbora, stalnih i ad hoc komisija;
- b) vođenje računovodstva Saveza;
- c) pripremanje sjednica Skupštine, Izvršnog odbora, stalnih i ad hoc komisija;
- d) vođenje zapisnika na sjednicama Izvršnog odbora, stalnih i ad hoc komisija;
- e) kontakti sa javnošću;
- f) pomoć i podrška članovima Saveza

Sekretar

Član 51.

1 Prisustvuje sjednicama Skupštine, Izvršnog odbora, Komiteta za hitnost i drugih organa i tijela, učestvuje u raspravama u savjetodavnom svojstvu. U slučaju spriječenosti, može imenovati zamjenu.

2 Odgovoran je za obavljanje svih zadaća Sekretarijata.

XII RAČUNOVODSTVO

Fiskalna godina, budžet

Član 52.

1 Fiskalna godina Saveza počinje 1. januara/siječnja i završava 31. decembra/prosinca.

2 Izvršni odbor Saveza utvrđuje budžetske smjernice Saveza, finansijski plan prihoda i rashoda za tekuću godinu, koje razmatra i usvaja Skupština Saveza.

3 O vanrednim troškovima koji nisu predviđeni u budžetu odlučuje IO Saveza, preko dodatnog kreditiranja. O njima se raspravlja prilikom rebalansa budžeta Saveza.

4 Naredbodavac za izvršenje utvrđenog Plana prihoda i rashoda Saveza za tekuću godinu je Predsjednik Saveza.

Revizija računovodstva

Član 53.

1 Savez je obavezan voditi računovodstvene knjige u skladu sa Zakonom, kao i podnositi izvještaj o izvršenju Plana prihoda i rashoda koje razmatra i usvaja Skupština Saveza.

XIII FINANSIRANJE SAVEZA

Član 54.

1 Savez se finansira iz sljedećih izvora:

- a) kotizacije, članarine i takse članova saveza, klubova, sudija, trenera i ostalih službenih lica

- b) prihod od izrečenih kazni
- c) ostali prihodi.

2 Sredstva iz prihoda Saveza mogu se koristiti isključivo za razvoj nogometa, a u skladu sa ciljevima i zadacima Saveza.

Član 55.

Savez je obavezan da organizuje, vodi knjigovodstvo, finansijske i komercijalne poslove u skladu sa računovodstvenim i finansijskim propisima FBiH i BiH.

XIV TV I MARKETINŠKA PRAVA

Televizijski i radio prijenos

Član 56.

1 Za utakmice koje su u njegovoj nadležnosti, Savez je nosilac ekskluzivnih prava za televizijski i radio prijenos, kao i za bilo koje drugo korištenje i emitiranje putem slike ili zvuka, direktno ili snimkom, u cijelosti ili u dijelovima, s tim da klubovi imaju pravo na dio prihoda koji se odnose na domaća klupska takmičenja.

2 Klubovi su nosioci prava iz stava 1. ovog člana za turnire čiji su organizatori klubovi.

3 Izvršni odbor donosi pripadajuće odredbe o primjeni ovog člana.

XV TAKMIČENJA/NATJECANJA

Takmičenja/Natjecanja na nivou FS BPK-a Goražde

Član 57.

1 Savez je odgovoran za organizaciju takmičenja na nivou BPK-a Goražde koja mu je u nadležnost prenio NS F BiH. Sve njegove odluke po tom pitanju su konačne.

Član 58.

FS BPK-a Goražde organizuje i sprovodi kantonalne stepene takmičenja u seniorskoj i omladinskoj kategoriji (prvenstvo JKL-ge) kao i KUP natjecanje koje mu je u nadležnost prenio NS F BiH.

Član 59.

1 Svako takmičenje ili turnir organizovan u BPK-a Goražde na međunarodnom, državnom, međukantonalnom nivou podliježe odobrenju od strane NS FBiH i NS/FS BiH.

Pravila takmičenja

Član 60.

1 Izvršni odbor donosi pravila: propozicije i odgovarajuće akte za takmičenja na nivou BPK-a Goražde i za druga takmičenja koja su u njegovoj nadležnosti.

2 Uslov za učestvovanje na takmičenju je da klub prihvata Statut Saveza, pravilnike NS/FS BiH, NS FBiH i FS BPK-a Goražde i odluke donesene u skladu sa njima.

Zabrana udruživanja ili saveza

Član 61.

1 Svaka liga ili bilo koja druga grupa klubova udruženih u FS BPK-a Goražde mora biti podređena i priznata od strane FS BPK-a Goražde.

2 Statuti i pravilnici takvih udruženja prethodno moraju dobiti saglasnost Izvršnog odbora Saveza.

4 Klubovi ne mogu formirati nikakve kombinacije ili saveze bez prethodnog odobrenja izvršnog odbora Saveza.

5 Bez izričitog odobrenja, klubovi koji su članovi Saveza ne mogu igrati protiv klubova koji nisu učlanjeni u Savez.

XVI DISCIPLINSKA PRAVILA

Član 62.

Disciplinske mjere mogu biti izrečene za nesportsko ponašanje, povredu Pravila nogometne igre i prekršaj Statuta Saveza, pravilnika ili odluka donesenih u skladu sa njima.

Disciplinske mjere

Član 63.

1 Članovima Saveza mogu biti izrečene disciplinske mjere, u skladu sa Disciplinskim pravilnikom NS/FS BiH.

2 Vrste disciplinskih mjera su:

I Za pojedince:

- a) opomena;
- b) novčana kazna;
- c) zabrana igranja određenog broja utakmica ili za određeni period
- d) zabrana obavljanja funkcije za određeni period
- e) isključenje iz kluba;
- f) isključenje iz nogometne organizacije.

II Za klubove i asocijacije:

- a) opomena;
- b) novčana kazna;
- c) zabrana odigravanja utakmica u inostranstvu;
- d) zabrana odigravanja utakmica na određeno vrijeme na određenom igralištu ili svim igralištima određenog regiona;
- e) zabrana igranja sa gledateljima;
- f) oduzimanje bodova;
- g) negativni bodovi;
- h) vraćanje u niži stepen takmičenja;
- i) diskvalifikacija iz takmičenja.

Član 64.

- 1 Pravna tijela ovlaštena su za izricanje disciplinskih mjera
- 2 Disciplinske mjere mogu biti izrečene istovremeno vezano za pojedini slučaj.
- 3 Klubovi, općinski savez Goražde i Udruženja dužni su se pridržavati i primjenjivati pravosnažne disciplinske kazne prema svojim članovima i provoditi ih u roku od 30 dana u protivnom ne mogu imati delegate u Skupštini i članove Izvršnog odbora Saveza.
- 4 Lica koja su kažnjavana Disciplinskim pravilnikom NS/FS BiH i koja se vode u evidenciji kazni, po članu 43. Disciplinskog pravilnika NS/FS BiH ne mogu se kandidovati u organe i tijela FS BPK-a Goražde, NS FBiH i NS/FS BiH do brisanja iz registra kazni.

XVII S P O R O V I

Nezavisni i nepristrasni arbitražni tribunal – CAS

Član 65.

- 1 FS BPK-a Goražde, njegovi članovi, klubovi, igrači, službena lica i drugi učesnici u organiziranom nogometu mogu u konačnoj instanci svaki spor domaćeg karaktera koji proizilazi ili je vezan za FS BPK-a Goražde, Statut, propise, direktive i odluke donesene u vezi s njim, kao i sporove vezane za bilo koji ugovor, podnijeti na isključivu nadležnost CAS-a u Lozani, u Švicarskoj. Izvršni odbor može putem NS/FS BiH uspostaviti odgovarajući dogovor sa CAS-om kojim se određuje postupanje u slučajevima FS BPK-a Goražde kao članice NS FBiH i NS/FS BiH.
- 2 CAS ostaje priznati arbitražni tribunal NS/FS BiH sve dok sportska organizacija ne uspostavi, u skladu sa zakonodavstvom BiH, odgovarajući arbitražni tribunal za teritoriju Bosne i Hercegovine, koja zadovoljava minimalne zahtjeve FIFA-e i UEFA-e.
- 3 CAS donosi konačna rješenja u sporovima, uz isključenje bilo kojeg redovnog suda, osim ako to nije eksplicitno zabranjeno važećim zakonima Bosne i Hercegovine.
- 4 U slučajevima kada je odluka statutarnog tijela FS BPK-a Goražde postala konačna i nema drugih dostupnih pravnih lijekova, strana koja ima pravnog interesa može žalbu na takvu odluku podnijeti CAS-u, uz isključenje žalbe pred bilo kojim redovnim sudom.
- 5 Ako se strane ne dogovore drugačije, pred CAS-om važe švicarski zakoni.
- 6 Međutim, CAS neće razmatrati žalbe po ovim pitanjima:
 - a) žalbe u vezi sa kršenjem Pravila igre,
 - b) žalbe na suspenzije do četiri utakmice ili do tri mjeseca,
 - c) žalbe na odluke koje donose nezavisni i propisno formirani arbitražni tribunal saveza ili konfederacije,
 - d) odluke tijela za licenciranje klubova.
- 7 Što se tiče FIFA-inih odluka u međunarodnim stvarima, primjenjuju se relevantne odredbe FIFA-inog Statuta.

Nadležnost

Član 66.

- 1 FS BPK-a Goražde, njegovi članovi, igrači i službenici, klubovi, agenti za utakmice i igrače, službena lica Saveza svoje sporove neće podnositi redovnim sudovima, osim ako to nije konkretno predviđeno ovim Statutom i FIFA-inim propisima. Svako neslaganje će se podnositi na nadležnost FIFA-e, UEFA-e, NS/FS BiH ili NS FBiH ili FS BPK-a Goražde.
- 2 FS BPK-a Goražde je nadležan u internim sporovima, tj. sporovima između stranaka koje pripadaju FS BPK-a Goražde. NS/FS BiH je nadležan u međuentitetskim sporovima, tj.

sporovima između stranaka koje pripadaju različitim entitetima. FIFA je nadležna u međunarodnim sporovima, tj. sporovima između stranaka koje pripadaju različitim savezima ili konfederacijama.

XVIII ZAVRŠNE ODREDBE

Važeći zakoni i teritorijalna nadležnost

Član 67.

¹ U svim slučajevima kada je to potrebno, pored ovog Statuta, Statuta NS FBiH i Statuta NS/FS BiH i pravilnika i poslovnika organa Saveza i NS/FS BiH, kao i odluka nadležnih organa saveza, primjenjivat će se prvo odgovarajući Statuti FIFA-e i UEFA-e, propisi i direktive, kao supsidijarni propis, prije primjene zakonodavstva Federacije Bosne i Hercegovine i Bosne i Hercegovine.

² Postupci koji se provode pred statutarnim tijelima FS BPK-a Goražde, vode se u skladu sa relevantnim odredbama propisa FS BPK-a Goražde. Ako ti propisi ne daju odgovor, prvo se primjenjuju odgovarajući statuti FIFA-e i UEFA-e, propisi i direktive, kao supsidijarni propis, prije primjene Zakona o upravnom postupku FBiH.



Materija koja nije obuhvaćena Statutom

Član 68.

Izvršni odbor ovlašten je da odlučuje o svim pitanjima koja nisu obuhvaćena ovim Statutom ili u slučajevima više sile, a u skladu sa pravom i pravdom.

Raspuštanje Saveza

Član 69.

- 1 U slučaju da nastupe okolnosti na osnovu kojih Savez prestaje da postoji, za odluku o raspuštanju Saveza potrebna je $\frac{3}{4}$ većina članova Skupštine Saveza.
- 2 U slučaju raspuštanja Saveza nadzor nad imovinom Saveza će biti povjeren NS F BiH do ponovnog formiranja saveza. Članovi Saveza ne mogu imovinu podijeliti između sebe.

Primjena

Član 70.

Statut je usvojila Skupština FS BPK-a Goražde Odlukom broj: 20-04-7/18 na sjednici održanoj dana: 19.04.2018 godine. Odluka će se početi primjenjivati osam dana od dana usvajanja, do kada će Izvršni odbor FS BPK-a Goražde objaviti tekst novog Statuta.

Član 71.

Stupanjem na snagu ovog Statuta prestaje da važi Statut FS BPK-a Goražde usvojen na sjednici Skupštine 09.05.2017. godine.

Obaveza prilagođavanja sadašnjih statuta

Član 72.

- 1 Obavezuju se klubovi da svoje statute usklade sa novim odredbama Statuta FS BPK-a Goražde na redovnoj sjednici Skupštine u 2018 godini a najkasnije do 31.12.2018 godine.
- 2 Svi organi Saveza moraju svoje akte, pravilnike i poslovnike uskladiti sa ovim Statutom u roku od šest mjeseci od dana usvajanja novog Statuta.
- 3 Do usaglašavanja sa ovim Statutom primjenjivat će se odredbe postojećih pravilnika i poslovnika i ostalih akata Saveza koji nisu u suprotnosti sa ovim Statutom.
- 4 Tekst Statuta će se štampati na službenim jezicima Saveza.

SEKRETAR

Nedim Omanović



PREDSJEDNIK

Muhidin Rašić





FUDBALSKI SAVEZ BOSANSKO-PODRINJSKOG KANTONA GORAŽDE

Broj: 06-10-1/20
Goražde, 06.10.2020.godine

Skupština FS BPK Goražde, na osnovu člana 22. Statuta FS BPK Goražde, na redovnoj sjednici održanoj 06.10.2020.godine u Goraždu, donosi slijedeću:

ODLUKU

o izmjenama i dopunama Statuta FS BPK Goražde

1. U članu 7. stav 2. iza tačke (l) dodaje se nova tačka (m) i glasi:
„da Direktive iz FIFA- e UEFA-e, NS/FS BiH i NS FBiH, a shodno odlukama Izvršnog odbora FS BPK Goražde, provodi na niže organizacione nivoe (klubove i udruženja) u skladu sa odredbama ovog Statuta.
2. U članu 16.iza stava 1.dodaje se tačka (g) i glasi: „ Da kandidati za članove tijela na dan imenovanja u tijela FS BPK ne mogu biti stariji od 75 godina“.
3. U članu 18. stav 1. mjenja se tekst i sada glasi:
„ Delegate u Skupštinu Saveza mogu dati samo klubovi koji se takmiče u seniorskoj konkurenciji minimalno kontinuirano zadnje 3 godine, izuzev što Klub futsala (mali nogomet) ima pravo dati delegate za izbore u 2020.godini.
4. U članu 22. stav 1. tačka (t) briše se tekst: „ a poslije 2019.godine najmanje 3(tri) kandidata“. I novi tekst člana 22. tačka (t) sada glasi:
„ Odobrava listu od najmanje dva kandidata (uključujući i zamjenske članove) za Izvršni odbor NS Federacije BiH i NS/FS BiH koji predstavljaju FS BPK-a Goražde.
5. U članu 24. briše se tačka 2. i tekst: „za izbore u NS FBiH i NS/FS BiH nakon 2019.godine Skupština FS BPK-a Goražde predlaže najmanje po 3(tri) imena koja predstavljaju FS BPK-a Goražde.

O b r a z l o ž e n j e

Skupština Fudbalskog saveza Bosansko-podrinjskog kantona Goražde na redovnoj sjednici održanoj 06.10.2020.godine u Goraždu razmatrala je pitanje Izmjena i dopuna Statuta FS BPK Goražde, odnosno njegovo usaglašavanje sa posljednjim izmjenama Statuta NS/FS BiH od 25.08.2020. godine i NS Federacije BiH od 25.09.2020.godine.
Imajući u vidu navedeno, odlučeno je kao u dispozitivu.

SEKRE TAR
Nedim Omanović

PREDSJEDAVAJUĆI SKUPŠTINE
Muhidin Raščić



Bosnia and Herzegovina
Federation of Bosnia and Herzegovina
Bosnian-podrinje canton Gorazde
MINISTRY OF JUSTICE, PUBLIC ADMINISTRATION AND LABOR

Broj:UP-1: 05-04-96/20
Goražde, 27.10.2020. godine.

Ministarstvo za pravosuđe, upravu i radne odnose Bosansko – podrinjskog kantona Goražde, rješavajući po zahtjevu FUDBALSKOG SAVEZA BOSANSKO – PODRINJSKOG KANTONA GORAŽDE, na osnovu člana 33. Zakona o udruženjima i fondacijama (“Službene novine Federacije BiH”, broj:45/02), *donosi*,

RJEŠENJE

1. U Registar udruženja Ministarstva za pravosuđe, upravu i radne odnose Bosansko – podrinjskog kantona Goražde pod registarskim brojem **R-I-17/1997** u prvu Knjigu registra upisan je **FUDBALSKI SAVEZ BOSANSKO – PODRINJSKOG KANTONA GORAŽDE**.
2. Upisuje se u Registar udruženja koji se vodi kod Ministarstva za pravosuđe, upravu i radne odnose Bosansko-podrinjskog kantona Goražde, promjena slijedećih članova Statuta Fudbalskog saveza Bosansko – podrinjskog kantona Goražde:
 - U članu 7. u stavu (2) iza tačke „ l)“ dodaje se nova tačka „ m)“ i glasi: „ da Direktive iz FIFA-e UEFA-e, NS/FS BiH i NS FBiH, a shodno odlukama Izvršnog odbora FS BPK Goražde, provodi na niže organizacione nivoe (klubove i udruženja) u skladu sa odredbama ovog Statuta“.
 - U članu 16. u stavu (1) iza tačke „ f)“ dodaje se nova tačka „ g)“ i glasi:“da kandidati za članove tijela na dan imenovanja u tijela FS BPK ne mogu biti stariji od 75 godina“.
 - U članu 18. stav (1) mijenja se i glasi: „Delegate u Skupštinu Saveza mogu dati samo klubovi koji se takmiče u seniorskoj konkurenciji minimalno kontinuirano zadnje 3 godine, izuzev što Klub futsala (mali nogomet) ima pravo dati delegate za izbore u 2020. godini“.
 - U članu 22. u stavu (1) u tački t) riječi:“a poslije 2019. godine najmanje 3 (tri) kandidata“ se brišu.
 - U članu 24. stav (2) se briše.

Ove Izmjene i dopuna Statuta čine sastavni dio Statuta Fudbalskog Saveza Bosansko – podrinjskog kantona Goražde od 19.04.2018. godine.

3. Upisuje se u Registar udruženja koji se vodi kod Ministarstva za pravosuđe, upravu i radne odnose Bosansko – podrinjskog kantona Goražde, promjena delegata u Skupštini

FS BPK-a Goražde, tako što se **Karović Lejludin** razrješava dužnosti, a novi delegat u Skupštini FS BPK-a Goražde je **Zijad Paleta**.

4. Upis promjena iz tačke 2. i 3. dispozitiva ovog Rješenja izvršena je dana **27.10.2020. godine**.

O b r a z l o ž e n j e

FUDBALSKI SAVEZ BOSANSKO – PODRINJSKOG KANTONA GORAŽDE upisan je u Registar udruženja, koji se vodi kod Ministarstva za pravosuđe, upravu i radne odnose BPK-a Goražde, dana 06.08.1997. godine, pod registarskim brojem R-1-17/1997 u prvu Knjigu registra.

Zahtjevom broj: UP-1:05-04-96/20 od 21.10.2020. godine, obratio se Fudbalski Savez Bosansko – podrinjskog kantona Goražde za promjenu Statuta.

Už zahtjev je priložena Odluka broj:06-10-1/20 od 06.10.2020. godine, o izmjenama i dopunama Statuta FS BPK-a Goražde, Odluka broj:06-10-2/20 od 06.10.2020. godine o prihvatanju novog delegata u Skupštinu FS BPK-a Goražde ispred NK "Kolina" Ustikolina, Odluka Izvršnog odbora broj:11-09-9/20 od 11.09.2020. godine i Zapisnik sa redovne Izvještajne sjednice Skupštine FS BPK-a Goražde, broj:06-10/20 od 06.10.2020. godine.


U postupku razmatranja zahtjeva i priloženih dokaza Ministarstvo za pravosuđe, upravu i radne odnose Bosansko-podrinjskog kantona Goražde, ocjenilo je da su ispunjeni uslovi za upis u registar promjena, stoga je na osnovu člana 33. Zakona o udruženjima i fondacijama ("Službene novine F BiH", broj: 45/02), odlučeno kao u dispozitivu ovog rješenja.

Administrativna taksa u iznosu od 2,00 KM i 15,00 KM uplaćena je po Tarifnom broju 1. i 83. Zakona o administrativnim taksama („Službene novine Bosansko – podrinjskog kantona Goražde“, broj:12/13 i 12/15), i dokaz o njenoj uplati nalazi se u spisu predmeta.

Naknada za upis promjena udruženja u registar udruženja u iznosu od 100,00 KM uplaćena je na odgovarajući račun u skladu sa Rješenjem, broj: 05-14-120/14 od 12.03.2014. godine i dokaz o uplati nalazi se u spisu predmeta.

Ovo rješenje je konačno u upravnom postupku i protiv istog se ne može izjaviti žalba, ali se može pokrenuti upravni spor tužbom kod Kantonalnog suda u Goraždu u roku od 30 dana od dana dostavljanja rješenja. Tužba se podnosi u dva istovjetna primjerka i uz istu se prilaže ovo rješenje u originalu ili prepisu.

Postupak vodila


Alma Šabanija, dipl.pravnik

DOSTAVLJENO:

- ① FS BPK-a Goražde,
2. Federalnom ministarstvu pravde,
3. Ministarstvu za obrazovanje, mlade, nauku, kulturu i sport BPK-a Goražde,
4. Poreska uprava F BiH, Kantonalni porezni ured Goražde,
5. Sl.novine BPK-a Goražde i
6. a/a.-

MINISTAR


Nataša Đanojlić, dipl.pravnik